

POLITICA E ISTITUZIONI/2

La cultura, leam te la neva Euregio Tirol-Sudtirolo-Trentin

L GECT permet che teritories che partegn a Stac desvalives mete sù gropes de cooperazion sorafora i confins. L Comun general de Fascia podessa tor pèrt al Consei consultif de l'Euregio

L piorament de l'emergenza globala te chest scomenz del 2021 l'è stat compagnà da na prejenza più staifa de la Union Europea. Enceben che la sie te na fasa senestra de sie prozess de integrasion, la prejenza sorafora de l'UE l'è l pont de referiment per garantir l coordinament de la politiches statèles che, a desferenza de etres tempes storic, veit duc si comembres se dèr jù a la valiva maniera te la endesfida sanitàera, economica e sozièla.

Te la Union aboncont l'è ence na dimenjion, che de spes se peissa che la sie de manco emportanza, che no la loara aldò di confins di Stac: se trata de l'Euroregion, tecnicamente Grop european de cooperazion teritorièla (GECT). Metù sù del 2006 dal Regolament CE 1082/2006, l GECT l'è n strument che permet che teritories che partegn a Stac desvalives mete sù gropes de cooperazion con personalità giuridica. L GECT se cruza de endrezèr e gestir azions de cooperazion sorafora la seides teritorièles, statèles e regionèles, col se dèr n'organizacion, n patrimoniè e l personal. No l'è donca realtà più concreta che deida a recognoscer noscia partegnuda storica, noscia tradizions comunes e nosc dejiderie a n davegnir de union.

L'Euroregion Tirol-Sudtirolo-Trentin, secondo CEGT te la Tèlia, e prum te l'Austria, festeja chest an diejem an de vita.



L'Euroregion Tirol-Sudtirolo-Trentin.

L'Euregio no l'è demò n scartabel sun strèda

L'Euregio purampò à zebrà sie cedean mingol sot man via ajache l pech confront e la propenjion de la trei regions a tor dant la crisa vardan beleche demò daite de sie teritorie, à limità l valor de l'element che, più che ogne auter, lea storicamente la doi Provinzies Autonomes de Trent e Busan e l Land austriach del Tirol: la cultura. L'Euregio no l'è demò n scartabel sun strèda al scomenz de la region o na stema metuda su la ferates regionèles che porta a Dispruch, ma cogn esser n crousdevia che, dal passà comun, se slèria fora ai obietives e ai enteresc del prejent, ruan a ge dèr vita a n fort leam culturèl che va sorafora i

confins nazionei e l deida a creèr una de la arees economicamente e sozialmente più virtuosas de l'Eruopa del doman.

L'Euroregion Tirol-Sudtirolo-Trentin l'è na piataforma esclusiva per potenzièr l teritorie e smaorèr l benesser de la jent. Con 1,8 milioni de sentadins slariè fora su n teritorie de 26.255 km², l'è vegnù fora desvaliva desferenzes anter la regions che tol pèrt a la cooperazion. La desvalianza economica l'è l'aspet più gran, ma se l'economia vel dir interdipendenza, la cultura pel e cogn voler dir autonomia e union. Dinrèr te la sentes istituzionèles se se domana colun che l'è l fator che à portà la trei regions de l'Euregio a esser medemes da n pont de veduda sozio-economic. La risposta no



Francesco Gabrielli.

l'è segur la politica, che vegn portèda inant a na vida desvaliva da ogneun di trei teritories.

L'element dezisif per la union del teritorie, che palesa la simbiosia anter ativitàes umane, ambient e tradizions, te na soula parola, l'è cultura. Te n moment canche la endesfides emponudes da la pandemia favoresc la zentralisazion di poderes a livel statal, l'è urgent e giust potenzièr l ruol di enc più vejins al sentadin. Vardianes del teritorie local, chesta istituzions les è zentralis te la promozion de la coejion culturèla e sozièla. Per chest, l'Euregio Tirol-Sudtirolo-Trentin l'è l met de se taèr fora n nef ruol tel rinforzament del leam culturèl anter sia trei regions e i comuns che l'è te si teritories.

L Comun general de Fascia del Consei consultif de l'Euregio

Defat la neva condizions chèder del GECT perveit de tor ite i comuns sot forma de n «Consei consultif de l'Euregio» che vegnarà smaorà ensema ai Consorziè di comuns e se perveit che l vegne metù sù te l'uton del 2021. Tel medemo temp la presidenza de l'Euroregion passarà a la Provinzia Autonoma de Trent che cognarà ge dèr neva gaissa a la cooperazion sorafora i confins, con neves stimoi per l'inovazion culturèla.

Tel nef Consei consultif de l'Euregio per mie cont aessa da tor pèrt ence l Comun general de Fascia, desche istituzion che raprejenta politicamente e culturalmente la mendranza ladina de Fascia. Chest permetessa n confront più diret e strutturà con l'otra mendranzes e coi Ladins del teritorie de l'Euregio. Tel vers de na maor colaborazion anter la realtàes linguistich-culturèles di trei teritories, la prejenza de l'Euregio moscia l'emportanza che de na cultura pervaliva anter noscia comunitàes, leèdes ma autonomes, che deida ence a conjobièr i enteresc economics, soziè e ambientèi. Descheche senza lum no l'è desvalianza de colores, senza cultura no l'è spezifità, e donca no pel esser autonomia.

Francesco Gabrielli, component del Consei general del CGF e canzelist de la Neva UAL